



Inatsisartunut ilaasortaq, Naaja H. Nathanielsen, Attaviitsoq  
/Maani

## Appat pillugit apeqqut nr. 105-imut akissuteqaat

Inatsisartut suleriaasianni § 37, imm. 1 naapertorlugu appat pillugit apeqqutinik Naalakkersuisunut nassiussaqaarsimavutit. Apeqqutitit uanga suliaasaqarfinnut akisassanngortinneqarput.

- 1) *Nunatta kujataani piniarnermut nakkutilliisup assilisaata takuteqqippaa appaqassutsip kinguariartupiloornera. Assit nutaat kujataaneersut Naalakkersuisut timmissanut nalunaarutissap allanngornissaanik pissutissaqalersinngilai?*

Apeqqut 1-imut)

Naalakkersuisut nalunaarummik nutarterilluni sulineq aallartinneqareersimasoq ingerlatiinnarpaat tusarniaanermi akissuteqaatit tunngavigalugit. Innaq timmissat inaata assinga nalunaarutissamut missingersuutip nutarterneqarneranut kisimi tunngaviunngilaq.

Pinngortitaleriffiup paasissutissiinera naapertorlugu appat sakkortuumik ikileriarnernut pissutaasut arlaliupput. Mannissarniarneq peqquataasut ilagaat, pissutsit allat aamma sunnuteqarnerat Pinngortitaleriffimmit tikkuarneqarpoq, ilaatigut silaannaap pissusaata allanngoriartornerata appat nerisaannut sunnuteqarnera. Taamaattumik appat piniagaanerat kisimi peqquaanngilaq suli ikiliartornerannut. Tassunga atatillugu silaannaap pissusaata allanngoriartornera iliuuseqarfigisinnaanngilarput. Sakkugisinnaasatta ilagaat appat piniagaanerisa aqunneqarnissaa aamma paasisitsiniaaneq, tassunga ilanngullugu mannissarniarnerup inertequtaanerata paasissutiginnissaa. 2009-mi allannguinermi sukaterisimanerit iluaqutaasimapput, aamma nutarterinermi maannakkut ingerlanneqartumi sukatereqqinnissaaq sulissutigaarput.

Timmissat pillugit nalunaarut missingersuut 2015-imi november/december-imi tusarniutigineqarpoq. Tusarniaanermi akissutit misissornerini nalilersornerisalu kinguneraat maannakkut appat ukuninnga piniagaaffeqarnissaat siunnersuutigineqarmata:

Ukiakkut piniarfii:

Zone 1: Qaanaap aqutsiveqarfia;	1.09-28/29.2
Zone 2: Upernaviup Uummannallu aqutsiveqarfii;	15.09-15.11
Zone 3: Ilulissaniit Nanortalik ilanngullugu;	1.11-31.12
Zone 4: Tasiilaq aamma Ittoqqortoormiit;	1.11-31.12

Upernaakkut appanniarfik:

Zone 1	1.03-15.6
Zone 2	15.04-15.05
Zone 3 + 4:	Appanniartoqaqqusaanngilaq

21-04-2016  
Sags nr. 2016 - 6739  
Akt. nr. 2577834

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apnn@nanoq.gl  
www.naalakkersuisut.gl

Upernaakkut appanniarnermut tunngatillugu zone-risap iluani nammineq atugassatut taamaallaat appanniartoqarsinnaassaasoq saqqummiunniarneqarpoq.

Missingersuut ataatsimoortoq Naalakkersuisunut saqqummiunneqassaaq, sulilu nalimmassaasoqarsinnaanera mattuteqqaneqanngilaq.

- 2) *Naalakkersuisut upernaakkut piniartarnej sivitsorniartaat imminut pilersorsinnaaneq ikiorserniarlugu. Tamannalu uumassoqassuseq tunngavigalugu siunnersuinermit toqqaannartumik akerliuvoq. Naalakkersuisut eqqarsaatigisimavaat imminut pilersorsinnaaneq ajornartorsiornerulissasoq, appat nungutaappata? Soormitaavaana tamanna nalilersuineq pingaartinneqarnerunngitsoq, mianersornissamik tunngaveqarnissaq eqqarsaatigalugu.*

Apeqqu 2-mut)

Illumoorpoq 2015-imi ukiakkut timmissat illersorneqarnerat piniagaanerallu pillugu nalunaarut missingersuummi tusarniutaasumi zone 2 aamma zone 3-mi upernaakkut appanniartoqarsinnaanissaa saqqummiunneqarmat. Tusarniaanermi akissutit misissoreerlugit tusaaniarpakka. Taamalu qulaani taaneqartutut zone 3 aamma zone 4-mi upernaakkut appanniartoqartassanngitsoq siunniunneqarpoq. Zone 2-mi soorlu tusarniaanermi saqqummiunneqartutut upernaakkut appanniartoqarsinnaassaag, ukiorissinerata nalaani kaperlattarnera peqqutigalugu.

- 3) *Aalisarnermut, piniarnermut nunalerinermullu Naalakkersuisup januarimi allaffigaa-nga kulturitsinniinngitsoq piniagassanik nungusaaneq. Illumut taamaassimassappat, soormitaavaana pisuussutivut uumassusillit killilersorneqartartut. Naalakkersuisut isumaqarpat killilersuinerit tamarmik unitsinneqassasut imaluunniit Naalakkersuisunit piniagassaqaassutsip aalisagaqaassutsillu aqunneqarnerani killilersuisarnerit ajunngitsutut isigineqarpat?*

Apeqqu 3-mut)

Pisassiissutinik aalajangersaaneq killilersueriaatsillu allat, soorlu ullormut pisarineqarsinnaasut, inunnik piniarsinnaatitaasunik killilersuineq, ukiup qanoq ilinera apeqqutaatillugu piffissamik killilersuineq, mannissarniarsinnaanermik inerteqquteqarneq, tunitsivinnut tuniniaanissamut inerteqquteqarneq il.il. periusaapput piujuaannartitsineq tunngavigalugu atuinissamut qulakkeerinneqataasinnaasut aamma pisariaqarfiatigut uumasoaqatigiinnut makkutarineqarpallaartunut killilliissutaasinnaasut. Pisassiisarneq pisariaqarfiatigut Naalakkersuisunit pingaartinneqarpoq. Taamaattumik Naalakkersuisut maanna uumasoaqatigiit killilersugaareersunik killilersuiunnaarsitsinissamik siunertaqanngillat.

- 4) Qaqugu timmissanut nalunaarut naammassineqassasoq ilimagisinnaavarput?

Apeqqu 4-mut)

November 2014-imi qinersisoqareernerata kingorna APNN-imit kissaatigineqarsimavoq taamanikkut Piniarnermut Naalakkersuisunngorlaaq timmissat pillugit nalunaarutissamut kissaatiminik ilanngussisinnaanissamut periarfissinneqarnissaa. Tamatuma kinguneraa tamanut ammasumik tusarniaaqqittoqarnera.

2015-imi ukiakkut tamanut tusarniaanermi akissutit misissornerisa paasinarsisippaa, tusarniaanermi akissutit suliarinissaannut piffissaq annertunerusoq pisariaqartinneqartoq. Taamalu naatsorsuutigineqarpoq timmissat illersorneqarnerat piniagaanerallu pillugu nalunaarut akuerineqassasoq aasaanerani sulinnigiffeqarnissaq sioqqullugu,

missingersuut nutaaq aamma tusarniaanermi akissutit Naalakkersuisunit  
misissorneqareerpata.

Inussiarnersumik inuulluaqqusillunga

Karl-Kristian Kruse